

浙江文叢

茅坤集

〔第四冊〕

浙江出版聯合集團
浙江古籍出版社

浙江文叢

茅坤集

〔第四冊〕

〔明〕茅坤著 張夢新 張大芝 點校

浙江出版聯合集團
浙江古籍出版社

玉芝山房稿

刻玉芝山房稿引

玉芝山房者，予以萬曆壬午移家練溪所卜築讀書處，且芝秀於其庭而因以名之者也。嘉靖年間，長兒積嘗刻《白華樓藏稿》若干卷，屬大中丞王敬所公序之矣。後二十年，仲兒縉舉進士，以行役來歸，復倒故篋，得《續稿》若干卷，已而又得《吟稿》若干卷。懼漸或散失，并序而刻之。甲申以來四五年間，又時時不能盡謝客所請或及移書而過者，亦時稍稍隨手報復。且老而從客飲輒醉，醉則狂歌不自持，起而濡墨以題，投之廢簞中。近發之，又共得詩文若干卷。貢兒復請刻之。予笑顧謂曰：「文不能本之道以求六籍者之至，而詩非古所稱『言志』，大較特於杯酒間宴酣淋漓相爲色澤，譬之蟲鳥之鳴春與秋焉而已耳，惡用是覆瓿爲也。曩已誤矣，其可再乎？」或曰：古人以著簪敝屢不忍遺，姑聽其刻而副之《家乘》，以遺子若孫者之覽睹云。時萬曆戊子夏四月朔日，鹿門山人茅坤書。

玉芝山房稿卷之一

歸安茅坤 順甫著

同邑陳曼年庚老校

五言古詩

雜詩

人生天地間，百年能幾時。如何束髮交，中道遽睽違？聚散若梗浮，蹤迹忽飄馳。春入好鳥鳴，秋來百卉腓。嗒然感物化，能無增懷悲？瞻彼南山松，上干青雲齊。女蘿攀虹幹，兔絲藂虬枝。綰帶相綢繆，勿爲霜雪摧。胡然獨搖落，東西各差池。中夜望河漢，潸然欲涕洟。

丹陽道中再別縉兒

人生苦離別，況我父子間。一日遠一程，道路多悲酸。名花開上林，春雲滿長安。豈不願翱翔？中情涕潺湲。爾行傍北斗，我歸卧南山。何時遂功名，樽酒娛衰顏。

哦松贈山僧

山僧手種松，蔦蘿已千尺。上懸照空花，下蔭聽幻石。鼉鼉鳴其顛，麋麋投其側。於焉日哦詩，俯仰聊自適。不知春與夏，并忘旦與夕。何如達磨年，深岩獨面壁。

七言古風

出塞歌有引

國家頻年馬市以來，諸邊烽燧之警已絕矣。大中丞胡公檄參軍從子一夔而下南繒帛，賦長歌以獻之。

秋來八月塞雲飛，塞馬悲鳴塞草腓。塞月如霜流野戍，塞風似戟磔征衣。嘉靖年來虜深入，旄頭星色過促急。吉囊部曲擁天驕，三關九鎮幾騷騷。鐵騎南來風雨移，胡塵慘澹四天垂。塞旗斬將無留刃，破壘摧城并卧屍。胡兒唵啗驍且驚，少小憑陵復恣肆。朝向偏頭犯鼓鼙，夕窺上谷傳兵幟。當時天子勒元戎，親犒三軍遣上公。虜帳疾馳恒候月，漢兵追躡若乘風。豈謂一朝胡運改，質子款關忽投鎧。年年通貢入天朝，歲歲牧駝還瀚海。稽顙稱臣列外藩，還同谷渾與烏桓。邊疆不見羽書突，幕府那聞甲馬喧。此時出塞開夷市，左右谷蠡獻駱

駟。漢家綺繒輕千金，胡兒歌舞歡穹壘。戰士三春解甲休，不須刁斗與兜鍪。猶言侯應罷邊策，無忘關山萬里愁。

題李文仲所繪百花圖歌

李山人，寫百花，珊瑚五采含風斜。盈盈欲捧仙掌露，紛紛亂映扶桑霞。趙昌畫花特花貌，君獨畫花傳花神。春夏秋冬隨手腕，陰晴風雨適天真。解衣盤礴名園裏，百花如吟眉睫底^{〔一〕}。興來染筆灑素縑，粉黛色澤風前起。滿堂賓客共解頤，無不拍掌稱徐熙。忽惹游蜂與狂蝶，競向几席窺花枝。七十髯翁却大笑，看來寫生如寫照。石家金谷競繁華，名蕤異卉并臻妙。臨風把玩經幾回，仰天浮白黃金壘，醉來不怪玉山頹。何當携掛草堂上，如飲酪奴三百杯。

弁山歌壽褚二府

弁山高兮岫流雲，苕水深兮波回紋，獻壽杯兮禮歲君。朱弦奏兮紫笙聞，歌聲沸兮舞袖紛，仙人降兮鸞鶴群。浮大白兮醉且醺，樂不支兮情孔殷，期千秋兮訪赤文。

校勘記

〔一〕「吟」，疑爲「盼」之誤。

玉芝山房稿卷之二

歸安茅坤 順甫著

同邑陳曼年庚老校

五言律詩

中秋夜同諸友宴集

明月憐君輩，花前數侑杯。
流光寫笙吹，灝氣抱樓臺。
人向瑤池醉，林邀銀漢開。
樗蒲并六博，一賞一徘徊。

贈嵇山人二首

野老厭頽俗，頻將麋鹿隨。
閨中却少婦，竹裏獨支頤。
一□□□金，□□或赴危。
年來多澹宕，擬近古豪痴。

豈謂君逃景，何當水抱林。
到來人絕迹，只覺鳥繁音。
敗壁頽垣曲，幽蘿密篠深。
蕭然似

螭卧，一榻擁高吟。

同李少白吳養貞游昆山

即潘印川司寇別業

誰謂昆山路，忽成金谷園。層欄控霧壑，曲磴綰天門。島嶼窗中綴，松蘿掌上捫。尚書履何處，芳草待王孫。

題長春閣

聞君枕市曲，一榻卧鶯花。四壁圖書潤，層欄水木華。心將俗共遠，日以醉爲家。但得鄰酤熟，頻邀長者車。

贈雷道人

韓康不二價，君散囊中裝。遍聚折肱客，頻施搗髓方。仙人鵝蕊草，玉女露華漿。一切千金饋，花間耻問償。

賀千户侯李靖宇新婚

共羨少年郎，言從結客場。鵲橋飛漢渚，龍煖炫星裝。五色芙蓉帳，千金璫瑁床。合歡漏

未盡，夢屬楚襄王。

桐廬俞山人秋夜過山齋

中林抱膝吟，忽爾客星臨。帶綰釣臺色，桐携江水音。九秋回雁候，千里故人心。不覺坐來久，霜流花木深。

嘉靖甲辰令丹徒萬曆甲申送縉兒赴京再過丹徒賦此

鐵瓮城猶舊，鶯花戶半移。當年雌雉處，空卧麗牲碑。山色懸題障，江流駛墨池。我來多慨慷，能不醉哦詩？

元宵客毘陵道中懷武林曹山人三首

曹丘久不見，想只在西湖。空傍魚龍市，人游山水圖。千林競火樹，六博鬥樗蒲。此夜歌塵裏，誰同袒臂呼？

我卧春江上，君游俠客場。伊人渺何處，中夜鬱相望。鴻雁客千里，風烟天一方。何時掉談塵，膝席共壺觴？

無問弈登品，不辭酒解醒。欄衡初卜社，袁瓌復同盟。醉後酷奴伴，興來花魅迎。客游多

絕調，慣使座中驚。

夜宿錫山道中

夢醒夜未央，病榻漏偏長。忽聽枕流雁，愁看劍拂霜。客魂傍鮫室，詩骨倦星裝。安得肘生翼，中宵歸故鄉。

同曹丈過萬竹園園即予所構長灘別業

我豈嵇中散，君應阮步兵。共耽山水癖，同結竹林盟。雲落裁冠簪，風傳戛玉聲。何如游嶰谷，并作鳳凰鳴。

過西湖簡問社中諸友

聞說西湖社，鶯花久罷題。煙寒三竺外，草怨六橋西。蘿薜仙人洞，笙歌學士堤。一觴還一咏，何日共招携？

中朝徵王吏部繼山賦詩勸駕二首

尚書期不顧，久矣欲逃虛。譽望屬當宁，弓旌守臥廬。底須奉朝請，豈得狎樵漁？無學

鑿坏者，君王方好儒。

早耽樹下鍛，獨卧丘中樊。避景身逾疾，徵書吏在門。無嫌過郎署，行且踐臺垣。天子憐耆舊，還看不次恩。

湖上逢温州張海方過訪

我卧西湖上，君從雁宕過。相看俱逆旅，攬帶并烟波。肘後游山賦，囊中吊古歌。何當載樽酒，隨意訪松蘿。

贈醫者潘慧峰潘少奉浮屠者

起家同賈島，抱術事長桑。露掇仙人草，霞蒸玉女漿。折肱聚如市，爪幕伎非常。吾亦慚衰晚，從君乞禁方。

挽白野先生

文昌忽爾閔，博士已宵亡。不見林中叟，應除地下郎。遺文蠹塵篋，留影掛空堂。吊草投何處？猿啼欲斷腸。

過武康山中

間俗過岩邑，人烟幾百家。白雲卧鷄犬，綠野帶桑麻。不見催科吏，行看滿縣花。停車共田父，相對說年華。

贈凌司訓過富陽兼柬陳邑諭

早歲擅才名，明經貢上京。人除秦博士，出授魯諸生。山色分官舍，江流縮誦聲。況逢太丘在，歡爲故交迎。

吳山人玉川過訪賦贈

幾年不相見，相見復悲辛。垂翅憐栖鳥，窮交感故人。青山還似舊，白首總如新。異日重經過，同采薜荔春。

冬夜寒甚懷曹文二丈客姑蘇道中

不堪歲已暮，君輩客江皋。風色射疑戟，冰流聚若刀。鄰舟那乞火，野店絕沽醪。寄語閭門市，誰憐俠骨豪？

夜卧哭亡兄并弟

白首憐兄弟，何堪長夜悲。枕流鴻雁泪，腸斷鵲鴒詩。大被還誰共，孤燈強自持。夢中驚攬帶，能不涕交頤？

陶生赴王臨川之招詩以送之二首

仗劍客游路，西行幾日程？江流飲去馬，野店醉春鶯。徐穉看雲處，陳蕃下榻迎。到來官舍裏，山色與書聲。

匹騎千山路，行行響杜鵑。飛崖棧綠樹，懸竇瀉紅泉。落日雙龍劍，春風二月天。停驂問井邑，萬戶散歌弦。

答門生王君實寄南太學試監元卷

匹騎洛陽去，客游偏借名。試文傳六館，紙價踴都城。冠帶園橋聽，公卿倒屣迎。諸生問經說，無謂受匡衡。

送李太學游燕

年少幾如君，翩翩氣不群。處囊翻脫穎，草賦欲凌雲。馬首燕山去，鶯聲漢苑聞。桂枝高擢處，飛檄寄參軍。乃翁官京衛經歷。

夢中讀徐天目集有序

天目君少予，予第進士十五年歷外藩，而君始及釋褐爲比部郎。予比函萬壽表入朝，而君與世所稱五子者以詩聲相長雄，予亦未之考睹也。久之罷官，君亦左遷來歸，始及覽詩什數章，翩翩矣。數猶疑其叱咤之音，非所謂「詩言志」，而以之咏嘆淫佚者之旨也。其沒也，予始及卒讀之，蓋多匠心矣。竊嘆予吳興，錢起、孟郊以後無聞也。歲乙酉春，病甚，數哦而愛之，夢所題繫者如左。

徐陵沒已久，始及讀遺編。詩什俱唐響，文章或別傳。岩中耀白雪，竹裏掛紅泉。錢孟千秋後，於今振雅弦。

簡寄王臨川紹賓

琴臺看不見，想只掛孤城。官舍青山色，春江白雪聲。雙魚何處寄？千里不勝情。何日